

THE PURPOSE OF LIFE

(ANG TUMONG SA KINABUHI)

Nakapangutana ka na ba sa imong kaugalingon sa pag-ingon: UNSA MAN GAYOD ANG KATUYOAN SA KINABUHI? NGANONG GIBUHAT MAN SA DIOS ANG TAWO? Nganong gihatag man kita sa Dios ug kinabuhi. Nganong ania man kita sa kalibotan karon? Unsa man gayod ang katuyoan sa Dios nganong gibuhat man kita niya? Mao kini ang usa ka lihitimong pangutana nga kinahanglan ang tubag niini masayran sa matag usa ka tawo. Dili nimo madiskobrihan ang katuyoan sa kinabuhi sa tawo ug ang kahulogan sa kinabuhi sa tawo pinaagi sa pagtan-aw sa imong kaugalingon lamang. Kay dili ikaw ang nagbuhat sa imong kinabuhi. Mao nga dili gayod ka mahibalo nganong gibuhat ka kon pinaagi lamang sa imong kaugalingong panghunahuna. Sama ra kana nga pakit-on kag usa ka butang nga gi-imbento nga wala pa gayod nimo makita sukad masukad, dili gayod ka masayod unsay katuyoan sa maong butang hangtod nga ka sultihan sa nagbuhat niana o sa naggama niana. Mao usab niini ang atong kinabuhi. Dili gayod kita mahibalo unsay katuyoan niini, dili kita masayod unsay kahulogan sa atong kinabuhi kon magsugod kita sa pagtan-aw sa atong kaugalingon lamang. Kinahanglan moangkon kita nga dunay nagbuhat kanato, kinahanglan dawaton nato nga adunay magbbubuhat sa tanan. Ug kini mao ang Dios.

1. YOU MUST BEGIN WITH THE CREATOR - GOD

Genesis 1:27(MBB) “Busa gibuhat sa Dios ang tawo, lalaki ug babaye, sama sa iyang dagway.” Kini nagpasabot nga usa sa tanan, kinahanglan nga motoo kita nga naay nagbuhat sa tawo ug kini mao ang Dios. Kon moingon ka nga walay Dios, dili na gayod ka masabot unsay katuyoan sa kinabuhi kay sayop naman daan ang imong pagsugod. Kinahanglan magsugod kita sa insaktong konsepto aron mosangko kita sa insaktong conclusion. Kinahanglan motoo gayod ka ug kinahanglan dawaton gayod nimo nga kining tanan nga imong nakita sa imong palibot, apil ka, kini tungod kay dunay nagbuhat niining tanan, ug kini mao ang Dios. You must believe that there is a creator of everything. We must begin with the creator nga mao ang Dios. Ang kataposang bahin sa bersikulo nag-ingon **“sama sa iyang dagway.”** Kini nagpasabot nga kinahanglan nga motoo kita nga gibuhat kita niya ‘sama sa iyang dagway’. Nagpasabot kini nga gibuhat sa Dios ang tawo nga matarong.

Genesis 2:7(MBB) “Unya mikuha ang Ginoong Dios ug yuta ug nagbuhat siyag tawo gikan niini. Gihuypan niya ang bubo sa ilong sa tawo sa gininhawa nga naghatag ug kinabuhi ug ang tawo nakabaton ug kinabuhi.” Kini nga bersikulo nagsulti kanato giunsa pagbuhat sa Dios ang tawo. Sumala niini nga bersikulo, gibuhat niya ang tawo gikan sa yuta, nagpasabot, wala pa ang tawo diha na ang kalibotan, diha na ang yuta. Ang unang bahin sa bersikulo nag-ingon **“Unya mikuha ang Ginoong Dios ug yuta ug nagbuhat siyag tawo gikan niini”**. Kini nagpasabot nga ‘wala niya isulti ang pagbuhat sa tawo kondili iya kining giuol ug gihuypan sa iyang gininhawa ang buho sa ilong niini nga maoy hinungdan nga nakabaton ang tawo sa kinabuhi. Kini nagpasabot nga ang tawo dili gikan sa onggoy nga maoy gitudlo sa uban kondili gihimo ang tawo sa Dios gikan sa yuta ug gihatagan niyag kinabuhi. Ug gibuhat niya kini nga babaye ug lalaki aron sila mosanay ug modaghan pinaagi sa pagpanganak. Kini nagpasabot nga lahi ang mga onggoy, lahi sad ang tawo. Ang mga tawo nga nagtudlo nga ang tawo gikan sa onggoy ug ni-evolve kono hangtod nga nahimong tawo, ila kining gitudlo tungod kay dili man sila makatoo nga dunay Dios nga naghimo sa tanang butang. Usa kini ka pag deny sa existence sa Ginoo, usa kini ka pag deny nga naay creator of everything nga maoy nagbuhat sa tawo. Aron masayod kita sa insaktong katuyoan sa kinabuhi sa tawo, kinahanglan magsugod kita sa insaktong konsepto, kinahanglan atong dawaton nga adunay magbbubuhat sa tanan.

Salmo 19:1(MBB) “Ang kalangitan nagpadayag sa himaya sa Dios, ug ang kawanangan nagpakita sa iyang mga buhat.” Ang pag-ingon nga **Ang kalangitan nagpadayag sa himaya sa Dios** kini nagpasabot nga ang kalangitan mismo nga atong makita nagpadayag nga dunay Dios. Nagpadayag usab kini sa pagkagamhanan sa Dios. Mao nga kining atong nakita nga kawanangan lig-ong ebedensya nga anaa gayoy Dios nga maoy nagbuhat niini. Ug ang ikaduhang bahin sa bersikulo nag-ingon **“ug ang kawanangan nagpakita sa iyang mga buhat”** kini nagpasabot nga ang kawanangan nagpakita kini sa mga buhat sa Dios. Nagpakita kini unsa siya nga matang sa pagkamagbbubuhat. Sama gud sa panday mailhan nimo unsa siya nga matang sa

pagkapanday pinaagi sa mga butang nga iyang pinanday o pinaagi sa mga butang nga iyang gihimo. Busa, kon mohangad ka sa kalangitan makita nimo unsa nga matang sa Dios kining nagbuhat sa maong kawanangan. Ang atong solar system lang mismo diin anaa nahimutang ang atong planeta nga earth nga mao kining atong gipuy-an karon. Hunahunaa lang, ang atong solar system anaa mahisakop sa gitawag nga Milky Way Galaxy. Kining makita nimo nga kalangitan ug kawanangan parte lang kini sa gitawag nga Milky Way Galaxy diin parte niini ang atong solar system. Ug hinumdumi nga sumala sa science, there are probably more than 100 billion galaxies in the whole universe. Imagine, ingon niana ka lapad ang kawanangan, ingon niana ka lapad ang universe. Busa dili gayod mahitabo nga walay nagbuhat niini kay dili motunga ang usa ka butang kon walay nagbuhat niini. Ang Biblia nagsulti kanato nga ang Dios maoy nagbuhat ug nagpalungtad niining tanan.

Roma 1:20 “Sukad buhata sa Dios ang kalibotan, ang iyang dili makita nga mga kinaiya – ang iyang gahom nga walay kataposan ug ang iyang pagkadios, nakita sa klaro kaayo diha sa mga butang nga gibuhat sa Dios. Busa wala na silay ikabalibad.

Ang unang bahin sa bersikulo nag-ingon **Sukad buhata sa Dios ang kalibotan, ang iyang dili makita nga mga kinaiya – ang iyang gahom nga walay kataposan ug ang iyang pagkadios, nakita sa klaro kaayo diha sa mga butang nga gibuhat sa Dios.”** Kini nagpasabot kanato nga ang kabuhatan nagpamatuod nga aduna gayoy Dios, makita nimo unsa siya nga matang sa pagkaDios tungod sa mga butang nga iyang gibuhat, makita nimo unsa siya ka gamhanan tungod sa mga kahibulongang butang nga iyang gibuhat. Dili gayod ka makalimod nga walay Dios kay gipadayag sa Dios nga anaa siya ug unsa siya nga matang nga pagka creator pinaagi sa mga butang nga iyang gibuhat. Mao kini ang punto ni apostol Pablo. Mao nga miingon ang kataposang bahin sa bersikulo. **Busa wala na silay ikabalibad.** Kini nagpasabot kanato sa klaro nga dili gayod ka makangulipas sa kataposang panahon nga moingon ka nga walay Dios. Kay wala magkulang ang Dios sa pagpaila sa iyang kauglingon nga anaa siya. Mao kini ang unang punto nga kinahanglan atong masayran ug atong dawaton ug toohan nga dunay Dios nga nagbuhat niining tanan. Aron masayod kita sa insaktong katuyoan sa kinabuhi sa tawo, kinahanglan magsugod kita sa insaktong konsepto, kinahanglan atong dawaton nga adunay magbubuhat sa tanan.

2. YOU MUST KNOW YOUR OWNER’S MANUAL – BOOK OF THE LORD (BIBLE)

Kinahanglan masayod ka sa manual sa nagbuhat kanimo. Ang pinaka-sayon nga paagi sa pagdiskobre sa tumong sa usa ka butang nga binuhat mao ang pagpangutana sa nagbuhat. Ang Dios maoy nagbuhat sa tawo ug adunay manual ang Dios diin gipadayag niya ang katuoyan sa pagbuhat sa tawo. Gipadayag sa Dios sa klaro ang tumong sa atong kinabuhi pinaagi sa iyang mga pulong nga mao ang Biblia. Diin anaa diha gi-explain niya nganong aduna kitay kinabuhi, unsaon nato pagkinabuhi, unsaon nato paggawi, unsay angay natong likayan ug unsay angay natong buhaton ug unsay atong umaabot nga kinabuhi.

Isaias 34:16(ABMBB) “Susiha ug basaha sa libro sa Ginoo: Walay usa kanila nga makulang o mawad-an sa iyang pares. Kay pagbuot kini sa Ginoo ug ang iyang Espiritu maoy magtigom kanila.” Ang pag-ingon nga **Susiha ug basaha sa libro sa Ginoo”**,

ang libro sa Ginoo kini nagpasabot sa Kasulatan nga karon atong gitawag Biblia. Kini nagpasabot nga kinahanglan susihon nato ang libro sa Ginoo nga mao ang Biblia. Kinahanglan magsusi kita sa pulong sa Dios kon unsay gisulti niini mahitungod kanato kay mao kini ang manual sa Dios para kanato aron mahibalo kita unsaon nato paggamit ang atong kinabuhi. Ang pag-ingon nga **Walay usa kanila nga makulang** kini nagpasabot nga ang tanang gisulti niini matuod gayod, kompleto gayod ug walay limbong nga anaa niini, pulos kini matuod. Nagpasabot, makaplagan nimo nga walay pangutana nimo nga dili niya matubag. Nagpasalig gayod ang pulong sa Dios nga wala kini kulang. Mao nga nagpasabot kini nga ang tanan nimong gikinahanglan mahitungod unsaon sa pagkinabuhi nga maoy gusto sa Dios naay tubag ang Biblia, naay tubag ang pulong sa Dios. Sa tanan nimong problema, mga kalibog, mga pangutana sa kinabuhi naay tubag ang pulong sa Dios nga mabasa nimo sa Biblia. Mao nga importante gayod kaayo nga masayod gayod kita sa mga pulong sa Dios nga anaa sa Biblia. Dili na kinahanglan nga imo pa kining dugangan o kuhaan insakto nga kini, kompleto na kini, kay kon imo kining dugangdugangan diha madaot ang imong kinabuhi, kinahanglan kon unsa ray nasulat maoy tumana, ayaw na kuha ug dungangi.

Deuteronomio 4:2(ABMBB) “Ayaw dugangi o kuhai ang gisugo ko kaninyo. Tumana gayod ninyo ang gisugo sa Ginoo nga inyong Dios.” Kini nagpasabot nga ang pulong sa Dios dili na kinahanglan pa nimong dugangan. Tumana nalang, kon imo kining sundon ikaw ray mabulahan. Kon imo lang gayod nga tun-an ang gisulti sa Biblia walay gitudlo ang pulong sa Dios nga makadaot sa imong kinahanglan pulosa kini maayo sa imong kinabuhi aron maandam ka sa umaabot sa dili pa matapos ang imong kinabuhi. Nagpasulti kini kanato aron masayod nganong ania kita karon sa kalibotan.

a) You are not an accident

(Kon basahon nimo ang pulong sa Dios you will know that you are not created by accident, dili aksident nga ania ka sa kalibotan karon, plano kini sa Dios. Giplano niya ang imong kinabuhi.)

Ecclesiastes 3:1-2, 11(ABMBB) “Ang tanan nga mahitabo dinhi sa kalibotan mahitabo sa panahon nga gitakda sa Dios alang niini. (2)May panahon sa pagkatawo ug panahon sa pagkamatay; may panahon sa pagtanom ug panahon sa pag-ibot. (11)Nagtakda siyag hustong panahon alang sa tanang butang. Gihatagan kita niyag kaikag pagsusi sa mahitabo sa umaabot nga panahon, apan wala kita niya hatagig katagbawan ug hingpit nga pagsabot sa iyang gibuhat.” Ang bersikulo 1 nag-ingon **“Ang tanan nga mahitabo dinhi sa kalibotan mahitabo sa panahon nga gitakda sa Dios alang niini”**. Kini nagpasabot gayod nga ang tanang mahitabo sa kalibotan, mahitabo sa panahon nga gitakda sa Dios alang niini o sa panahon nga gitagal sa Dios alang niini. Bisan sa imong pagkatawo dinhi sa kalibotan, dili na aksidente, kon dili gitakda gayod sa Dios nga natawo ka nianang panahona, nianang dapita, nianang orasa, nianang bulana, ug nianang tuiga. May gitakda gayod ang Dios alang sa tanang butang nga mahitabo dinhi sa kalibotan. Mao nga miingon ang bersikulo 2 **“May panahon sa pagkatawo ug panahon sa pagkamatay; may panahon sa pagtanom ug panahon sa pag-ibot.”** Ang pag-ingon sa bersikulo 2 nga **“May panahon sa pagkatawo ug panahon sa pagkamatay;** kini nagpasaabot, nga bisan sa panahon alang sa imong kamatayon, dili na aksidente, kon dili gitakda gayod sa Dios nga mamatay ka nianang edara ug nianang panahona. Nagtagal ug nagtakda ang Dios ug panahon nga asa ka ra kutob niining kalibotana. Gipakasama kini sa pagtanom ug sa pag-ibot sa imong gitanom. Kon magtanom ka, aduna gayoy panahon nga anus-a nimo anihon ang imong gitanom. Sama niini ang pagkatawo ug ang pagkamatay sa tawo. May panahon sa imong pagkatawo o pagkahimugso ug may panahon sa imong pagkamatay. Ang Dios maoy nagtakda niana. Ang bersikulo 11 nag-ingon **“Nagtakda siyag hustong panahon alang sa tanang butang. Gihatagan kita niyag kaikag pagsusi sa mahitabo sa umaabot nga panahon, apan wala kita niya hatagig katagbawan ug hingpit nga pagsabot sa iyang gibuhat.”** Ang pag-ingon nga **“Nagtakda siyag hustong panahon alang sa tanang butang.”** Kini nagpasabot lamang nga ang Dios maoy nagtakda ug hustong panahon alang sa tanang butang nga mahitabo sa kalibotan. Nagpasabot walay mahitabo sa kalibotan nga wala tugoti sa Dios. Apil na niini ang hustong panahon sa imong kamatayo

Salmo 139:13,15-18(ABMBB) “Ikaw ang nagbuhat sa tibuok kong lawas; ikaw ang nag-umol kanako sa sabakan sa akong inahan. (15)Nakita mo ang akong mga bukog sa paghulma pa niini nga giayo pagsumpaysumpay diha sa sabakan sa akong inahan, sa dihang nagtubo ako didto sa tago. (16)Nakita mo na ako bisan sa wala pa ako mahimugso. Ang tagal sa panahon alang kanako nasulat na sa imong basahon bisan sa wala pa kini magsugod. (17)Pagkalisod tugkaron sa imong mga hunahuna, O Dios, pagkadaghan gayod niini. (18)Kon iphon ko kini, daghan pa kini kaya sa balas. Kon momata ako, uban gihapon ako kanimo.”

Ang bersikulo 16 nag-ingon **“Nakita mo na ako bisan sa wala pa ako mahimugso. Ang tagal sa panahon alang kanako nasulat na sa imong basahon bisan sa wala pa kini magsugod”**. Kini klaro kaayo nga nagpasabot kanato, nga wala pa ka matawo o mahimugso sa kalibotan nasayod na ang Dios anus-a ra ka kutob sa kalibotan. Ang tagal sa panahon alang kanimo nasulat na sa iyang basahon kon asa ra kutob ang imong kinabuhi dinhi sa kalibotan. Kini nagpasabot lamang gayod nga ang kinabuhi sa tawo tinagalan lamang, may tukmang panahon nga gitakda ang Dios nga anus-a niya kuhaon kining kinabuhia. Siya ang nagtakda niini. Ug sumala sa maong bersikulo nasulat na kini sa basahon sa Dios.

Bisan wala ka pa magsugod, kahibalo na siya sa imong katapusan. Mao nga miingon ang bersikulo 17 **“Pagkalisod tugkaron sa imong mga hunahuna, O Dios, pagkadaghan gayod niini”** kini nagpasabot nga lisod gayod nimo maapsan ang hunahuna sa Dios. Mao nga kinsa man kita mo-question sa Dios sa iyang mga paagi, kondili ang ato mao lamang ang pagsunod sa iyang ipabuhat kanato.

Job 14:5(MBB) “Ang gitag-on sa kinabuhi sa tawo daan nang gilatid, bisan ang gidaghanon sa iyang mga bulan. Gitagal mo na kini, O Dios, ug dili na gayod mausab.”

Kini nga bersikulo dayag kaayo nga nagsulti kanato nga ang gitag-on sa kinabuhi sa tawo daan nang gilatid sa Dios. Nasayod na siya sa gidaghanon sa atong mga bulan o sa atong mga katuigan dinhi sa kalibotan kon asa ra kita kutob. Kon mao na gayod na ang hustong panahon nga gikuha ka sa Dios dili na gayod na mausab. Dili na nimo kining mapugngan. Ang ato mao lang ang paghangyo sa Dios nga kon pwede iya pang lugwayan ang atong kinabuhi. Anaa kaniya ang pag-abot sa gitag-on sa atong kinabuhi.

Gisultihan kita sa Dios nga maoy nagbuhat kanato nga dili nato matugkad ang iyang kalaam.

Isaias 55:8-9(MBB) “Kay ang akong hunahuna dili sama sa inyong hunahuna, ni ang akong mga laraw sama sa inyong mga laraw, nag-ingon ang Ginoo. (9)Kay ingon nga ang kalangitan habog kay sa yuta, ang akong mga laraw habog kay sa inyong mga laraw, ug ang akong hunahuna kay sa inyong hunahuna.” Ang bersikulo

8 nag-ingon **Kay ang akong hunahuna dili sama sa inyong hunahuna, ni ang akong mga laraw sama sa inyong mga laraw, nag-ingon ang Ginoo.** Kini nagsulti kanato nga ang hunahuna sa tawo halayo ra kaayo sa hunahuna sa Dios. Ug ang mga panghunahuna sa Dios gihulagway ni propeta Isaias sa kahabog sa langit gikan sa yuta. Nag-ingon ang bersikulo 9 **“Kay ingon nga ang kalangitan habog kay sa yuta, ang akong mga laraw habog kay sa inyong mga laraw, ug ang akong hunahuna kay sa inyong hunahuna.”** Kini nagpasabot nga dili gayod nimo maapsan ang mga panghunahuna sa Dios. Dili gayod nimo siya malupigan sa iyang mga paagi ug sa iyang kahibalo. Busa kinsa man kita nga magbuot sa Dios kon unsay iyang buhaton. Mao nga kini nga bersikulo nagtudlo kanato nga kinahnglan mosalig kita sa Dios bisan sa mga panahon nga dili nato masabtan ang mga panghitabo nga moabot sa atong kinabuhi. Kay mas maalam siya kay kanato. Busa kinahnglan ibutang nato kanunay ang atong pasalig diha kaniya. Ang atong parte mao ang pagsunod sa iyang mga pulong, dili kay magsigi kitag question sa Dios sa iyang mga gipangbuhat, dili kay magsigi lamang kitag duhaduha kaniya kon sakto ba ang iyang mga pamaagi. Usahay ang mga tawo ila pang blemon ang Dios sa mga panghitabo inay moduol sila sa Dios aron nga makat-on unsay buot ipasabot sa Dios. Matud ni propeta Isaias nga dili kita angay nga makiglalis sa Dios sa iyang mga gipangbuhat, sa iyang mga pamaagi.

Isaias 45:9-11(ABMBB) “Alaot ang makig-away sa iyang magbubuhat, kay sama ra kini sa kulon nga nakig-away sa magkukulon! Moingon ba ang yuta nga kulonon ngadto sa magkukulon, ‘Unsay imong gihimo? O ‘May katakos ka ba? (10)Alaot ang moingon ngadto sa iyang amahan ug inahan, ‘Nganong gipkatawo pa man ko ninyo? (11)Mao kini ang giingon sa Ginoo, ang Balaang Dios ug Magbubuhat sa Israel: Wala kamoy katungod pagpangutana kanako bahin sa akong mga anak. Ayaw ako ninyo tudloi sa akong buhaton.” Ang bersikulo 9 nag-ingon

“Alaot ang makig-away sa iyang magbubuhat, kay sama ra kini sa kulon nga nakig-away sa magkukulon! Moingon ba ang yuta nga kulonon ngadto sa magkukulon, ‘Unsay imong gihimo? O ‘May katakos ka ba? Kini nga bersikulo nagsulti kanato nga ang Dios mao ang Magkukulon ug kita ang mga kulonon. Sa lain pang pagkasulti, ang Dios mao ang panday kita ang mga pandayonon. Nakakita ka na ba nga duna kahoy nga mireklamo sa panday nga dili siya gusto nga himoog lamesa kay ang iyang gusto lingkoranan. Wala gayod. Ang panday gayod ang magbuot kon unsang matanga sa butang ang iyang himoon. Siya ang magbuot kon pila ka tiil ang ibutang niya sa lamesa dili kay ang lamesa maoy magbuot kon pilay iyang tiil. Mao usab kini ang Dios. Dili nato tudloan ang Dios kon unsay iyang buhaton. Kinsa man kita nga motudlo kaniya? Dili kita angay moreklamo sa Dios nga ‘nganong Filipino man ko, maayo unta tong Amerikano ko ba? Nganong itomon man ko? Siya ang nagbuot nga Filipino, busa siya ang nagbuot sa imong hitsura. Ayaw, basula ang imong mga ginikanan nga ingon niana ang imong hitsura kay dili sila maoy nagbuot niana. Mao nga miingon ang bersikulo 10 **Alaot ang moingon ngadto**

sa iyang amahan ug inahan, ‘Nganong gipkatawo pa man ko ninyo? Kay dili ang imong ginikanan maoy nagbuot nga makatawo ka sa kalibotan kondili ang Dios. Daghang mga bata nga gustong i-abort sa inahan apan natawo hinoon nga normal. Dunay mga inahan nga munamuna gayod nilang amping aron dili makuha ang bata, apan nakuha hinoon. Kon ania man ka sa kalibotan karon kini tungod kay giplano ka sa Dios, dili aksidente nganong ania ka sa kalibotan. Ayaw na pakiglalis sa Dios kondili kinahanglan nga masayran nimo nganong ania ka sa kalibotan. Ug kini bahin sa Kasulatan gikutlo ni apostol Pablo sa dihang naghigut sa God’s Sovereign Choice. Ang magamhanong pagpili sa Dios.

Roma 9:20-21(MBB) “Apan kinsa ka man nga makiglalis sa Dios? Tawo ka lamang! Makaingon ba ang yuta ngadto sa magkukulon, ‘Nganong giingon mo ako niini pagbuhat? (21)Wala ba diay katungod ang magkukulon sa paghimo sa minasang yuta ngadto sa duha ka matang sa kolon – ang usa mahalon ug ang usa baratohon?”

Kini nagpasabot kita angay nga moreklamo dili ta Dios, tawo ra kita, mga binuhat ra kita sa Dios. Wala kitay katungod sa pagtudlo sa Dios kon unsay buot niyang buhaton. Magbuot ta kon gihimo kita niya nga naay diferensya, magbuot ta kon gibuhat ka niya nga medyo flat ang ilang nga iya manang katungod. Mao nga dili ka matingala nga aduna gayoy mga tawo nga medyo naay diperensya.

Exodo 4:11(MBB) “Ang Ginoo miingon kaniya, ‘Kinsa may naghatag ug baba sa tawo? Kinsay naghimo kaniyang bungol o amang? Kinsay naghatag kaniyang igtatan-aw o naghimo kaniyang buta? Dili ba ako, ang Ginoo?”

Kini nagpasabot nga ang Dios maoy naghatag sa tawo ug mata apan makahimo usab siya paghimog tawo nga buta. Siya ang naghatag sa tawo ug baba apan makahimo usab siya paghimog tawo nga amang. Siya ang naghatag sa tawo ug dalunggan aron makabati, apan makahimog usab siya paghimog tawo nga bungol. Kon makamao ang Dios paghimog tawo nga tarong makahimo usab siyag tawo nga aduna deperensya. Mao kini ang punto ni Moises. Mao nga dili ka matingala nga duna gayoy mga tawo nga nangatawo nga buta, amang, bungol, enano, bukto, naa poy libat, naay bakang. Kini dayag kaayo nga nagsulti kanato nga ang Ginoo maoy naghimo sa tawong bungol, amang, ug buta. Kon ang Dios makamaong mohimo ug tawong makasulti, dili ba diay siya makahimog tawo nga dili makasulti. Makahimo man gani siyag tawo nga makasulti, tawo pa ka ha nga dili makasulti? Kon ang Dios makahimog tawo nga may mata nga makakita, dili ba diay siya makahimog tawo nga dili makakita. Kon ang Dios makahimog tawo nga may dalunggan nga makadungog, nan, pwede sad siyang maghimog tawo kansang dalunggan dili makadungog. Mao nga kon Biblia ang imong basihan nganong naay mga tawo nga natawo nga mga bungol, amang, buta, mongoloid ug uban pang matang sa mga tawo, ang Ginoo maoy nagbuhat kanila. Mitunga kini sila kay gibuhat kini sila sa Dios. Alang-alag ang Yawa maoy nagbuhat nila. Katungod na sa Dios sa pagbuhat ug klase-klaseng matang sa mga tawo. Kinsa man kita nga magbuot kon mopagawas ang Dios ug tawong buta, bungol, amang o mongoloid? Bisan dili pa ka gusto nga duna kay anak nga buta o bungol o amang o mongoloid, apan kon tugotan gayod sa Dios nga makabaton kag anak nga buta, o amang o bungol o mongoloid, wala gayod kay mahimo. Apan bisan pag mangayo ka sa Dios ug anak nga amang o anak nga buta o anak nga bungol o mongoloid kon dili gayod motugot ang Dios nga makabaton ka sa maong matang sa anak dili gayod ka makabaton niana. Katungod na sa Dios sa pagbuhat ug klase-klaseng matang sa mga tawo. Kinsa man kita nga magbuot sa Dios kon unsang matanga sa tawo ang iyang pagawason, nga iya manang katungod.

Levitico 21:18-20(MBB) “Dili makahimo paghalad ang buta o ang bakol o kadtong may bisan unsang daot sa iyang nawong, o wala magparihas ang gitason sa iyang tiil o bukton, (19)o kadtong nabalian ug tiil o kamot, (20) o ang buktot, o ang enano, o kadtong may daot sa iyang mata, o may nuka, o kadtong kinapon.”

Kini nagpasabot nga bisan sa Daang Tugon naa na kining mga matang sa tawo sama sa buktot, amang, bungol, may deperensya sa mata, naay tawo nga ang tiil wala magtupong ang gitason. Katungod sa Dios ang pagbuhat ug tawo nga klasiklasig hitsura, klaseklasig color sa pamanit. Ug klaseklaseg pangutok, naa bright, naa say medyo igo rag utok. Naay mga gwapo ug mga gwapa naa say medyo balikwaot ug mga nawong. Sumala ni apostol Pablo sa Roma 9:21 **“Wala ba diay katungod ang Dios sa paghimo sa tawo ngadto sa duha ka matang sa kolon – ang usa mahalon ug ang usa baratohon?”**

Juan 9:1-3 “Samtang naglakaw si Jesus nakita niya ang usa ka tawo nga buta sukad pa sa iyang pagkahimugso.(2)Ang iyang mga tinun-an nangutana kaniya, ‘Magtutudlo, kinsa may nakasala nga natawo man siyang buta? Siya ba o ang iyang mga ginikanan? (3)Si Jesus mitubag, ‘Ang iyang pagkabuta dili tungod sa iyang mga sala o sa mga sala sa iyang mga ginikanan. Siya natawong buta aron ang gahom sa Dios ikapadayag diha kaniya.” Kini nagpasabot nga ang mga tinun-an ni Jesus naghunahuna sila nga tungod kay natawo man siyang buta nagtoo sila nga silot na sa Dios kaniya o silot sa iyang mga ginikanan. Mao nga dili sad ka matingala nga daghan sa mga tawo karon naghunahuna nga kon aduna kay anak nga buta o bungol o amang o mongoloid nga gigabaan kono na sila. Dili na tinuod kon Biblia ang atong basihan. Sumala ni Jesus mismo nagpadayag hinoon kana sa gahom sa Dios. Kini nagpasabot nga kon makakita kag tawo nga natawong buta, amang, bungol, mongoloid ug uban pang matang sa tawo, nagpakita kini nga gamhanan kaayo ang Dios. Kon ang mahimo sa Dios nga tawo usa ra ka matang, kon ang Dios makamao lang mohimog tawong makakita ug dili siya makamaong mahimog tawong buta, nagpasabot dili siya gamhanan nga Dios. Apan kon ang Dios makamaong mohimog klaseklaseng matang sa tawo. Kon makamao siyang mohimog tawo nga taas, mubo, enano, puti, itomon, pikot, bakang, libat, buta, amang, bungol, mongoloid ug uban pang matang sa mga tawo nagpakita kana nga gamhanan kaayo ang Dios. Kay kon pareho pa tag pormag nawong tanan, parehog gitas-on, parehog pamanit, parehog buhok, parehog porma sa mata hilabihang gubota ang kalibotan puy-an. Kay kon dunay mangawat silod kaayo mailhan. Mao nga kon makakita kag klasengklaseng matang sa mga tawo sama sa buta, bungol, amang, mongoloid ug uban pang matang nagpadayag na sa pagkagamhanan sa Dios. Dili kay moingon hinoon kag gigabaan. Mao nga kon basahon nimo sa Biblia, ang mga tawo nga natawo nga dunay deperensya sa tuok sama sa mga mongoloid ug uban pang mga tawo nga natawo nga mentally ill, siguro sila nga maluwas. 1 Timoteo 4:10.

Bisan gani sa mga dapit o mga lugar nga pagapuy-an sa tawo, ang Dios maoy nagbuot niana.

Buhat 17:26(MBB) “Gikan sa usa ka tawo gibuhad niya ang tanang bulok sa katawhan, ug gipapuyo sila sa tibuok kalibotan. Daan na niyang gilatid ang mga panahon ug ang mga utlanan sa mga dapit nga ilang puy-an.” Ang unang bahin sa bersikulo 26 nag-ingon **“Gikan sa usa ka tawo gibuhad niya ang tanang bulok sa katawhan”** kini dayag kaayo nga nagsulti kanato nga ang Dios maoy nagbuhat sa tanang bulok o klase sa mga tawo. Naay itomon, naay puti, naay pikot ug mata, naa say dagko mata, naa say tag-as nga tawo, naa say mugbo, naay bakang, naay kumpi ug uban pang matang sa tawo. Naay hapon, naay negro, naay amerikano, naay Filipino ug uban pang matang sa bulok sa mga tawo. Sumala sa Biblia, ang Dios maoy nagbuhat sa tanang bulok sa tawo. Mao nga sumala sa Exodo 4:11 nga atong gibasa nga ang nagbuhat sa tawong bungol, amang ug mga buta mao ang Ginoo. Bisan gani sa atong kahimtang sa kinabuhi siya ang nagbuot nga adunay dato, adunay pobre. Siya ang nagtugot niini.

1 Samuel 2:7(MBB) “Ang Ginoo maoy magbuot kinsay iyang himoong dato ug kinsay iyang himoong pobre. Siya ang mopaubos ug siya usab ang motuboy.”

Kini nga bersikulo sa Biblia nagsulti kanato nga katungod sa Dios ang paghimo sa tawo nga dato ug sa kabos. Kon ikaw nakabaton man ugaling karon ug dakodako nga katigayonan, ayaw kalimot nga ang Dios maoy hinungdan niana dili na tungod kanimo. Kay bisag bright ka pa nga pagkatawo kon dili gayod ka tugotan sa Dios nga makabaton sa maong butang dili gayod nimo mabatonan ang maong butang. Mga piniyalan lamang kita sa Dios. Mao nga atong gamiton sa insakto kining mga kabtangan, kining mga talento nga gihatag kanato sa Dios alang sa iyang kahimayaan.

Jeremias 15:2 “Kon mangutana sila kon asa sila paingon, ‘Ingna sila nga ako ang Ginoo nag-ingon: Ang gitagana kaninyo nga mangamatay sa sakit, mangamatay sa sakit! Ang gitagana nga mangamatay sa gubat, mangamatay sa gubat! Ang gitagana nga mangamatay sa gutom, mangamatay sa gutom! Ug ang gitagana nga pamihagon ug bilanggoon, pamihagon ug bilanggoon!”

Ang pag-ingon **“Kon mangutana sila kon asa sila paingon, ‘Ingna sila nga ako ang Ginoo nag-ingon: Ang gitagana kaninyo nga mangamatay sa sakit, mangamatay sa sakit!’**” Kini nagpasabot lamang gayod nga naay gitagana ang Dios unsang matanga sa kamatayan ang imong kamatyan. Kon ang gitagana sa Dios nga mamatay ka pinaagi sa sakit, mamatay gayod ka pinaagi sa sakit. Kon ang gitagana sa Dios nga imong kamatyan pinaagi sa sakit nga cancer bisan pag banggaan kag motor dili pa ka gayod mamatay kay dili man kana ang gitagana sa Dios nga imong kamatyan.

Nag-ingon pa gayod ang maong bersikulo **“Ang gitagana nga mangamatay sa gubat, mangamatay sa gubat”** kini nagpasabot, kon ang gitagana sa Dios nga imong kamatyan pinaagi sa gubat o pinaagi sa pusil bisan pag masakit kag diabetes dili gayod ka mamatay sa maong sakit kay ang gitagana sa Dios nga imong kamatyan dili man pinaagi sa sakit kondili pinaagi man sa pusil.

Nag-ingon pa gayod ang maong bersikulo **“Ang gitagana nga mangamatay sa gutom, mangamatay sa gutom”!** Kini nagpasabot nga kon ang gitagana sa Dios nga imong kamatyan pinaagi sa gutom, o sa lain pang pagkasulti pinaagi sa kalamidad o disaster. Sama pananglit sa bagyo, landsilide, linog, baha ug uban pang matang sa kalamidad, kon mao kini ang gitagana sa Dios nga imong kamatyan mao gayod kini ang imong kamatyan. Siya ang nagtagana niini. Nasayod na siya nga unsang matanga sa kamatayan ang atong kamatyan.

Isaias 46:10(MBB) “Sa sinugdanan pa gani nasayran ko na ang kataposan, ug nahibaloan ko na ang sangpotan bisan kon wala pa mahitabo; ipahayag ko nga dili gayod mapakyas ang akong plano ug tumanon ko ang tanan kong tuyo.”

Ang unang bahin sa bersikulo nag-ingon **“Sa sinugdanan pa gani nasayran ko na ang kataposan, ug nahibaloan ko na ang sangpotan bisan kon wala pa mahitabo”** Kini nagpasabot lamang gayod, nga sa dili pa mahitabo ang usa ka panghitabo sama sa kalamidad, kahibalo na ang Dios nga mo-landslide nang adlaw, molinog nang adlaw ug kahibalo na siyang daan nga mao nay mangamatay. Kay wala pa mahitabo ang usa ka butang nasayran na niya ang kataposan. Wala pa maglunod sa Cagayan kahibalo na ang Dios nga mao toy mahitabo. Ang kataposang bahin sa maong bersikulo nag-ingon **ipahayag ko nga dili gayod mapakyas ang akong plano ug tumanon ko ang tanan kong tuyo.”** Nagpasabot, nahitabo kadto tanan, tungod kay mao kadto ang giplano sa Dios nga mahitabo niadtong adlaw ug tumanon gayod niya ang iyang tuyo. Mao nga moabot gayod ang mga katalagman, mga kalamidad nga dili ka makalikay, mga katalagman o kalamidad nga wala gayod nimo damha nga moabot diay nianang panahona nga mao na diay ang imong kataposan, nga mao na diay ang imong kamatyan.

Isaias 47:11(MBB) “Apan moabot kanimo ang kadaotan, ug dili ka makalikay niini; modangat kanimo ang katalagman ug dili ka makalingkawas niini; ug sa kalit lamang moabot kanimo ang kalaglagan nga wala mo damha.”

Kini nagpasabot lamang gayod, nga moabot gayod ang mga katalagman o mga kalamidad nga dili ka makalikay, mga katalagman o mga kalamidad nga wala gayod nimo damha nga moabot diay nianang panahona nga mao na diay ang imong kataposan o mao na diay ang imong kamatyan.

Mao kini ang mga butang nga angay atong masayran sa kinabuhi. Kinahanglan magatoo kita nga adunay Dios nga nagbuhat sa tanang butang, apil kitang mga tawo. Ug siya ang magbubuot sa tanan. Siya ang naghatag kanatog kinabuhi. Dili aksidente nga ania ka sa kalibotan. Dunay purpose ang Dios nganong gihatagan kita niyag kinabuhi. Dunay tumong ang Dios nganong ania man kita sa kalibotan karon? Ug kini mao nga paghimaya kaniya. Gibuhat kita niya aron maghimaya kaniya. Gibuhat kita niya aron maghatag kitag kalipay kaniya. Busa kinahanglan nga ato siyang higugmaon labaw sa tanang butang.

b) You are created with a purpose - *You created to glorify God* (you love God is to glorify)

Mateo 22:36-38(MBB) “Mgatutudlo, nangutana siya, ‘unsa man ang labing dakong sugo sa Balaod? Si Jesus mitubag, ‘Higugmaa ang Ginoo nga imong Dios sa tibuok mong kasingkasing, sa tibuok mong kalag, ug sa tibuok mong hunahuna’. Mao kini ang labing dako ug ang labing importanting sugo.” Kining Mateo 22:36-38

naghisgut kini mahitungod sa tubag ni Jesus mahitungod sa pangutana nga **“unsa man ang labing dakong sugo sa Balaod? Ug mao kini ang tubag ni Jesus: “Higugmaa ang Ginoo nga imong Dios sa tibuok mong kasingkasing, sa tibuok mong kalag, ug sa tibuok mong hunahuna’. Mao kini ang labing dako ug ang labing importanting sugo.”** Ang paghigugma sa Dios labaw sa tanang butang mao ang pinakadakong sugo tungod kay mao kini ang pinakatamong nganong gibuhat kita sa Dios. Mao kini ang katuyoan nganong gibuhat niya ang tawo. Gibuhat kita sa Dios dili aron magpakasala, dili aron mosupak sa Dios kondili kita niya aron maghimaya kaniya. Ug dili ka makahatag ug himaya sa Dios hangtod nga dili nimo siya higugmaon labaw sa tanan.

Ecclesiastes 12:13(AB) “Kini mao ang katapusan sa butang; ang tanan nadungog na: Kahadloki ang Dios, ug bantayi ang iyang mga sugo; kay kini mao ang tibuok katungdanan sa tawo.” Ang pag-ingon nga **“Kahadloki ang Dios, ug bantayi ang iyang mga sugo”** kini nagpasabot nga likayan nato ang mga butang daotan. Kay sumala sa **Proverbio 8:13** nga-ingon nga **“Ang pagkahadlok kang Jehova maoy pagdumot sa dautan: ang pagdumot sa pagpagarbose, sa pagkamapahitas-on, ug sa dautan nga dalan.”** Kini nagpasabot lamang gayod kanato nga ang katuyoan sa pagbuhat sa Dios sa tawo mao nga magkibuhi kita nga balaan. Magkinabuhi kita nga matarong. Kinahanglan ato siyang higugmaon labaw sa tanang butang. Ug sumala ni apostol Juan sa 1 Juan 5:3 nga ang ilhanan nga gihigugma nato ang Dios mao nga gituman nato ang iyang mga sugo. Apan kay ang tawo nahulog man sa pagpakasala pinaagi sa pagsupak sa atong unang ginikanan. Mao nga apan dili nato kini matuman kon kitakita lang sa atong kaugalingon, nagkinahanglan kitag tabang gikan sa Ginoo. Ug mao kini ang hinungdan nga si Ginoong Jesus iyang gipadala nganhi sa kalibotan aron siyay mopuli sa atong dapit. Siya ang magpakamatay puli sa atong dapit. Siya ang gihatag sa Dios aron motubos sa atong makaluluoy nga kahintang. Ug tungod natuman naman ang gipabuhat sa Dios kang Jesus busa ang atong parte mao ang pagdawat pinaagi sa pagtoo sa iyang gibuhat sa krus alang kanato. Kinahanglan atong toohan nga ang iyang kamatayon igo nga moluwas kanato gikan sa silot. Mao kini ang gitawag nga grasya sa Dios tungod kay ang Dios mismo maoy nag-initiate niini nga buhat. Tungod kay gihatagan kita niya sa butang nga dili unta kita takos. Mao nga ang kaluwasan sa tawo gitawag kini nga grasya sa Dios. Buhat sa Dios dili buhat sa tawo.

Efeso 2:8-10(MBB) “Kay pinaagi sa pagtoo naluwas kamo tungod sa grasya sa Dios. Dili kini inyong buhat kondili gasa sa Dios. (9)Busa walay makapasigarbo niining sanglit dili man kini bunga sa inyong mga paningkamot. (10)Kita mga binuhat sa Dios, ug gibuhat kita niya diha kang Cristo Jesus aron magbuhat kitag maayo nga maoy iyang tuyo alang kanato.” Ang bersikulo 8-9 nag-ingon **“Kay pinaagi sa pagtoo naluwas kamo tungod sa grasya sa Dios. Dili kini inyong buhat kondili gasa sa Dios. (9)Busa walay makapasigarbo niining sanglit dili man kini bunga sa inyong mga paningkamot.”** Kining mga bersikuloha dayag kaayo nga nagsulti kanato nga ang kaluwasan grasya sa Dios kay dili gayod kita maluwas pinaagi sa atong kaugalingong paningkamot. Kay kon pwede pa dili na unta maghagohago pa si Cristo nga magpakamatay sa krus alang sa atong mga sala. Apan nagpakamatay siya aron kita maluwas kay mao na lamang kini ang bugtong paagi sa Dios aron maluwas ang tawo. Kaluoy nalang sa Dios ang chance sa tawo. Ug sa dihang motoo ka sa grasya sa Dios, sa dihang motoo ka kang Jesus nga maoy imong Ginoo ug Manluluwas sa imong kinabuhi, magsugod ang bag-ong kinabuhi nga makita sa imong kinabuhi. Mao nga miingon ang sunod nga bersikulo nga mao ang bersikulo 10 nga nag-ingon **“Kita mga binuhat sa Dios, ug gibuhat kita niya diha kang Cristo Jesus aron magbuhat kitag maayo nga maoy iyang tuyo alang kanato.”** Ang bersikulo 8-9 naghisgut nga kinahanglan kitang motoo kang Jesus, kay ang kaluwasan grasya kini sa Dios. Dili kita angay sa kaluwasan apan tungod sa grasya sa Dios, tungod sa iyang kaluoy nahatagan kitag kahigayonan ug kini mao nga motoo kita kang Jesus nga maoy mipuli sa atong dapit. Kinahanglan motoo kita nga siya ang nagtubos sa atong kasal-anan. Ug sa bersikulo 10 naghisgut na sa maayong buhat kay mao gayod kini ang original nga plano sa Dios alang sa tawo aron mahimaya ang Dios ug mahimaya ang iyang Anak nga si Ginoong Jesus, apan ang maong original nga plano sa Dios nadaot kini tungod sa sala. Busa kita pinaagi kang Jesus mapasig-uli na kita ngadto sa Dios, ug makabuhat na kitag mga butang nga makahimaya sa Dios ug sa iyang Anak nga si Jesu-Cristo nga mao tumong sa Dios sa iyang pagbuhat kanato.